

# **Folo yana leta nagona**

## **TESALONAIKA tovetumagana**

### **agaidiya**

Hida Tesalonaika tovetumagana yadi leta nagona Folo Kolinita againe gimiyami tu gi'etoladina. Tesalonaika melala kikaiwabuna taliyeya Masedoniya anafafaliya. Boi Folo yana lumamala-waliliuga anavelu againe gina Tesalonaika againe Venuwa'ata Yamumuna gimidilumamalena be ekelesiyai-nadi gitubuyemu. (Afositolo 17:1-14) Tovetumagana tufoidi miYuda tu tufoidi moy'a'idi yo'o tulidiyao kalivai-dina. MiYuda tufoidi Yesu ana tafalolo againe hidamana fa'ina, adi tonagona higa'uma'uma-mo'a be Folo ahenaohiwavidi be hina Beliya againe. Muliya Folo Timoti gi'iveninisena be miTesalonaika valeyadi haghagina gi'aliyena.

Hida leta againe Folo givesiule miTesalonaika yadi vetumagana vita tulina tulina agaidiya hiki-donena fa'ina kadu hidu'udu'una fa'ina. Folo nuwanuwana ase'asedi ginakivevatuna ada yadi toliluvaluva Yesu aimo keke gidayewa'ela tu badi tovetumagana himadu'alika-ma fa'idiya gifatana. Leta dobona hidede amine.

Lusiule. 1:1

Vesiule yadi vetumaganadona fa'ina. 1:2-10

Folo yana dewa miTesalonaika hinafadiya ma.  
2:1-12

Gavaimi yadi miyami fa'ina Folo nuwana gin-auna. 2:13-3:13

Lau'age dewa Yesu ana tovetumagana adi lauboda fa'ina. 4:1-12

Yesu yana yewa'ela ana kivetuvetunu ma. 4:13-5:11

Lau'age kadu lukafoi tulina tulina ma. 5:12-28

<sup>1</sup> Yo siule tobohiyameyao Yaubada yana yo'ogaga Tesalonaika againe kalivai-mina. Ime Folo Sailosi Timoti yami leta a'etoladina be wana'itana. Omi higa Yaubada Tamada kadu yada Kaiwabu Yesu Keliso yadi kaliva yadi vevine ma hinanuwadogemi kadu ase'asemi hinakiveniwalovina.

*MiTosalonaika yadi vetumagana fa'ina to'etoladi hivesiule.*

<sup>2</sup> Keke gavana fa'ina tu tova moya'aina Yaubada againe omi fa'imiya avesivesiule, kadu tova moya'aina yama ve'o'ola againe ami egana ayakayakahina.

<sup>3</sup> Tova be tova Yaubada Tamada matane anuwanunauyemi higa Yesu Keliso wavetumaganena fa'ina wa'i'idibumuhi, kadu Bana againe yami nuwanuwa wasena fa'ina yana faisewa againe wavedivediwe, kadu yada Kaiwabu Yesu Keliso yana yewa'ela walulubodena fa'ina wa'atu'atuvefa'ila. Tova moya'aina mena yami dewa haghagina yama ve'o'ola againe anuwanunauyena.

<sup>4</sup> Tobohiyameyao, Yaubada nuwanuwana omi'iyao, ada ahalamanena Bana giluwafami be yana yo'ogaga wanamiyami.

**5** Hidedemi ahalamanena, fa'ina Yaubada yana Venuwa'ata Yamumuna omi agaimiya alumamalena ana toveya keke adagahe-kawowo au Alu'aluwa Mahalina gifaiwalavelema-yo yama laumamala ase'asemi gi'onana, ada au ahalamanena makewa yama laumamala ma gahe velemo'ena. Ada ime boi hinafamiya amiyami ana toveya, omi wahalamanena gavaimi ahuluhuluva medemi ami veluga fa'ina ahuluvina.

**6** Tu omi'iyao ma ime wave'u'ulema kadu Kaiwabu wave'u'ulena. Vita tulina tulina kaliva nimadiya wanuhagana. Hidedemi omi yami watagiya nonogana Yaubada bonana keke wadakiloweni, au Alu'aluwa Mahalina gifaiwalavelemyo yami wavemwamwala wavenogalena.

**7** Ada au hidedemi wahuluva fa'ina, omi aba'ita tovetumagana moy'aidi Masedoniya kadu Akaiya anafafaliya himimiyami-ma fa'idiya.

**8** Kaliva hiulega hiyurvedonena be agona yuwa lauveya ginauna amine, meda omi yami huluva hagihagina againe venuwa'ata Kaiwabu fa'ine fafali moy'aina lauveya ginauna. Keke yami fafali Masedoniya o Akaiya agadiyagaga gidanauna, au yami vetumagana Yaubada againe valeyana fafali moy'aina yuwa lauveya ginauna. Medema fa'ina ime keke tamo gavadi anagaheyeni.

**9-10** Au mena mali fafali kalivadi taudiyo ime yama ela agaimiya ma hilukahihiyena, higa yami wa'asehawahega wavega'aulema. Higahe higa vaita balauma wavekwaulaugedyo Yaubada againe wahagavilami be Yaubada

velemo'ena kadu miyamiya-vagahina againe wahawahegemi, ada higa Natuna lobameya ginatauya be babiya ginayewa'ela-ma wanamiyabodana. Natuna Yesu ma alikeya gisivemididina ada Bana'e Yaubada yana ila'a aimo tokoyona agaidiya ginalakayemu-ma againe gilulugolegoleda.

## 2

*Folo yana faisewa miTesalonaika agaidiya fa'ina*

*tauna gibulava'itotogena.*

<sup>1</sup> Siule tobohiyameyao, kadu omi taumiyaو wahalamanena yama ela agaimiya au wa'agevavana. Keke ada'ela-kawowo higa vaita yama ela guwana keke.

<sup>2</sup> Wahalamanena boi melala ana egana Filifai againe kaliva himunukoyokoyoma kadu hi'ihawadamanema tu muliya miTesalonaika agaimiya a'ela. Ada nibaimeyao nuwanuwadi hinakivekoyoma nonogana Yaubada ase'asema gikivetoyogini-yo yana Venuwa'ata Yamumuna agaimiya alukahiihiyena.

<sup>3</sup> Yama lau'age inubana ma keke ve'alololo, keke nuwanuwa ita'italuvadigana fa'ina, kadu ime keke kaliva aikaunuwanuwameyao higa vaita yama bonayafayafa againe ananuwa'abiyemi, keke-mo'a.

<sup>4</sup> Au Yaubada gavaimi yana nuwanuwa anagaheyeni, medemi tova moy'a'aina

alulukahihi, higa vaita Yaubada yama dewa gida'itahalamaneni-yo ama vehimeya gidavelema, be yana Venuwa'ata Yamumuna analulumamalena. Keke kaliva nuwadi anakiveyamumuni fa'ina adalulukahihi. Au Yaubada nuwana anakiveyamumuna fa'ina agahegahe, Bana'e yama nuwanuwa ka'i yamumuna o koyona gi'itanuwenuwena amanadi.

<sup>5</sup> Omi wahalamanena keke tamo tova adabonayafeyafemi, keke tamo tova yami giba ada'italuvadigeni-yo bona digadigagina againe adasevauyen, keke-mo'a. Agahe velemo'ena ma Yaubada gihalamanena.

<sup>6</sup> Yama laumamala ana toveya keke kaliva agaidiya ama egana ana kailakata adaleleni, keke omi agaimiya kadu keke mali yo'o agaidiya adaleleni.

<sup>7</sup> Ime Keliso yana afositolo yana kabu avaina fa'ina, gavadi gavadi ama itave'avina fa'ina agaimiya adave'o'ola digo, medema gidalubodana. Tu keke ama itave'avina fa'ina agaimiya adave'o'ola. Keke medede amine faisewa adaveleme. Au kwamayoku natudiya kabi'odiyao hi'ita'itave'avidi amine, meda ime bonama bikabikana amine hinafamiya amiyami.

<sup>8</sup> Yama nuwanuwa agaimiya ase-mo'ena fa'ina, ahawahegema be Yaubada yana Venuwa'ata Yamumuna agaimiya anavetalaiyena, tu keke Venuwa'atagaga au taumeyao ahawahegema ami veluga fa'ina. Omi vaita tobohiyanuwameyao amine fa'ina omi fa'imiya taumeyao ahawahegema.

**9** Tobohiyameyao, makewa nuwami giulu yama wavediwe afifaisewa. Yaubada yana Venuwa'ata Yamumuna agaimiya alumamalena tu uyadayada be bogi taumeyao ama itave'avina fa'ina afifaisewa be keke ama ve'a fa'ina omi vita wanunuahagani.

**10** Tu yama dewa fa'ina omi amifaiweya wana'awatalatalaina kadu Yaubada anafaiweya gina'awatalatalaina, higa yama huluva omi tovetumagana agaimiya au haghagina kadu tunutunugina, ada keke tamo gavadi koyona agaimiya adafaisewani.

**11** Fa'ina wahalamanena kaliva natuneyao gi'itave'avidi amine, meda ime omi sa'eyana sa'eyana a'itave'avimi.

**12** Boi tova moya'aina alulu'ageyemi, ase'asemi akikivevatuna kadu agahegahevagadonemi be gava dewa Yaubada yana kaliva gilubodadi, medede amine wanahuluhuluva. Yaubada gikovami be yana yo'ogaga kalivai-mina vevine-mina ase'asemiya ginavehivehimeya ada Bana buye wanakaiwabu.

*Folo miTosalonaika yadi vetumagana fa'ina givesiule.*

**13** Kadu'e nuwanuwa sa'eyana fa'ina Yaubada againe avesivesiule, higa Yaubada bonana agaimiya alumamalena be wanogalina againe, keke wadagahe wadagayo, "Wama tomiyababi bonadi." Au wagayo, "Wona velemona Yaubada bonana hilulumamalena." Ada velemo'ena

medema Yaubada bonana, ada guwana omi tovetumagana nuwahinagemiya giseusena.

<sup>14</sup> Fa'ina tobohiyameyao wa'ita, Yaubada yana yo'o tulina tulina Yudiya anafafaliya Yesu Keliso againe himiyave'avina-ma hinuhagana amine, meda omi wanuhagana. Badi miYuda taudiyao yadi yo'o kalivai-dina Yesu Keliso againe hivetumagana-ma hikivekoyodi amine, meda yami yo'o kalivai-dina omi hikivekoyomi.

<sup>15</sup> Badi miYuda Kaiwabu Yesu hiluve'alikana ada Yaubada bonana ana to'awatalatalaina hiluve'alikadi kadu ime hiwavima. Wona velemona Yaubada nuwana hikivekoyona ada yadi venibaina fa'ina kaliva moya'aidi adi kibababala ana eda hisebodana.

<sup>16</sup> Wa'ita, higaluvaluva be hinahawatama be higa kibababala ana eda yo'o tulidiyao kalivai-dina agaidiya keke analumamalen. Au hidede amine yadi koyona ana gowa hivemagana. Tuwaina hivebutu koyona moya'aina hive'atutamo'aina be hinunauwena tova hidevama, ada yadi koyona ana gowa hivemagani-yo au adamoya Yaubada yana ila'a guwana badi agaidiya gilakalakayemu.

### *Folo nuwanuwana lakahina miTesalonaika*

#### *buye hinavemagigi'ita'ita.*

<sup>17</sup> Tu tobohiyakweyao ide fa'ideya ganagahe. Tuwaina badi kalivai-dina hiwavima-yo ahegemi tu nuwama mene aimo agaimiya gimimiyami. Tova kabisona kanuvehaila tu

avebutu eda alelelena be anayewa'ela, agaimiya atalatalanuwaiyemi fa'ina.

**18** Fa'ina nuwanuwama agaimiya anayewa'ela. Iya Folo tova gavaiyehi gagaluvaluva be ganayewaku tu Setani yama eda gisebodana.

**19** Yada Kaiwabu Yesu Keliso ginayewa'ela be Bana matane kanamiyami ana toveya, gava'adi yama abaluve'avina? Gava'adi yama abavemwamwala yama abagakahikahi? Me omi'iyao. Omi Yesu Keliso againe wamiyave'avina fa'ina, yama wavemwamwala anagakahikahi anagayo, "Hida hima yama faisewa guwana."

**20** E, wona velemona omi'iyao yama abagakahikahi kadu yama abavemwamwala.

### 3

*Folo Timoti miTosalonaika agaidiya  
gi'iveninisena*

*be valeyadi gina'aliyena.*

**1** Tobohiyameyao, keke buye kadav-emagigi'ita'ita fa'ina, ime ama'itoto a'ase'u'aulolo. E, ase'asema gi'u'aulolo-mo'a againe agahe agayo, "Ama'iselu-mo'a Adenisi againe anamiyami tu Timoti ginana."

**2-3** Au tobohiyama Timoti agaimiya a'iveninisena, bana'e Yaubada buye hififfaisewa be Venuwa'ata Yamumuna Keliso fa'ine gilulumamalena. E, tobohiyama a'iveninisena be Keliso ana vetumagana againe ginakivetoyogimi,

kadu ginalu'ageyemi higa vaita vita tulina tulina kaliva nimadiya wanuhagana fa'ina keke wanunuwayewa. Omi taumiyao ahe wahalamane-hagihagiyena mena vitai-dina Yaubada yana vehimeya againe ide agaideya gilakayemu.

<sup>4</sup> Ika, boi aimo buye kamiyami ana toveya avenuwa'ata-vagahimi vaita kaliva hinakivekoyoda. Ada taumadi wahalamanena medede amine gilakayemu.

<sup>5</sup> Ada vitai-dina wanuhagana fa'ina ase'aseku gi'u'aulolo-mo'a againe, Timoti ga'iveninisena be higa yami vetumagana valeyana gananogalina. Gamatauta ka'i Setani tamo gavadi againe gida'aladibidibiyemi ada au yama faisewa guwana gidaluyaweyawelina.

*MiTesalonaika valeyadi yamumuna Folo gino-galina fa'ina,*

*givemwamwala.*

<sup>6</sup> Tu Timoti agaimiya gitauya be ime agaimeya giyewana ada valeyami yamumuna gi'aliyena, higa yami wavetumagana yami wahawahega wamimiyami. Gigahema vaita tova moya'aina wadu'udu'uma kadu ime nuwanuwama omi ana'itami amine meda omi nuwanuwami ime wana'itama.

<sup>7</sup> Tu tobohiyameyao, yama ase'u'aulolo kadu ama vita tulina tulina agaidiya omi fa'imiya ase'asema givatu. E, yami vetumagana fa'ina a'asevatu.

**8** Ka'i omi Kaiwabu againe wanavetumagana toyogina be keke ma'ita wanunuwayewa amine o, ime wayawaima hagihagina anamiyami.

**9** Omi fa'imiya Yaubada againe avesivesiule. Yama vemwamwala lakahina omi fa'imiya givelema ada Bana matane avemwamwala-mo'a. Yada Yaubada keke kanawona!

**10** Bogi be uyadayada Yaubada againe a'awalulau'u higa vaita buye kanavemagigil'ita'ita ada gavaimi yami vetumagana againe wakali'aho, medema againe anavelugami be yami vetumagana ginatubuga-mo'a.

**11** Tu ave'o'ola be Yaubada Tamada Tauna kadu yada Kaiwabu Yesu yama eda hina'ivetuvetununa be agaimiya ana'ela.

**12** Kaiwabu Yesu againe ave'o'ola be yami ve'ahawahawahega kadu yami nuwanuwa hawahawahegana kaliva moy'aidi agaidiya ginatubutubuga ginatubutubuga tu nuwanuwa hawahawahegana againe wanawahivemavemauga. Omi ami nuwakabubu againe ime awahivemavemauga amine, meda omi ve'anuwakabubu againe wanawahivemavemauga.

**13** Kadu yada Yaubada ginafaiwalavelemi be aimo yada Kaiwabu Yesu ginayewa'ela ana toveya yana kaliva mahamahalidiyao buye'i, kadu omi mahamahalimiyao keke tamo yami wakoyona Yaubada Tamada matane wanamiyami.

## 4

*Yami dewa moy'a'aina againe Yaubada nuwana*

*wanakiveyamumuna.*

<sup>1</sup> Siule tobohiyameyao, kadu yaku gahe sa'eya-mo'ena. Boi akivetuvetunumi higa gavaimi wanahuluhuluva be Yaubada nuwana wanakiveyamumuna fa'ina. Ada au hidede amine wahuluhuluva. Tova adamoya Kaiwabu Yesu ana eganeya ave'o'olemi kadu agahevagadonemi be mena dewa haghagina againe wanatutuveguvegulami.

<sup>2</sup> Fa'ina ahe wahalamanena gava vehimeya Kaiwabu Yesu givelema, medema ahawavelevelemei.

<sup>3</sup> Tu Yaubada yana nuwanuwa omi fa'imiyia hidede amine. Nuwanuwana mahamahalimiya wanamiyami ada udo tulina tulina wanavekwaulaugedi.

<sup>4</sup> Gilubodana be moy'a'imi sa'eyana sa'eyana nagomi ana hawata fa'ina halamana wanavaina. E, dewa tunutunugina amine Yaubada matane kadu kaliva matadiya yami nuwanuwa aya'ayafanina wanavehimeyena.

<sup>5</sup> Badi kaliva Yaubada keke hidahalamanenima matadigadigaga againe hihawahawahegedi be keke ma'ita taudiyao hidahawatadi. Keke badi amine wanahuluva.

<sup>6</sup> Kaliva yadi huluva vevine agaidiya ma keke tamo hakwadi tobohiyana vavinena agaidiya ginakiluvaluva be hidede amine bana againe ginakivekoyo ada yana abavehimeya keke ginawowomumuyeni. Boi avenuwa'atami kadu agahemi toyogina, ka'i kaliva vevine agaidiya hinakoyo, au Kaiwabu adi matahiwadi ginaveledi.

<sup>7</sup> Fa'ina Yaubada keke gidakovada-yo udo againe kanamiyami. Au gikovada be dewa

yegayegana againe kanamiyami.

<sup>8</sup> Hidema fa'ina hai kaliva mena yaku kivetuvetunu gikilowena, keke kaliva bonana gidakiloweni au Yaubada Bana Alu'aluwana giveleme-ma bonana gikilowena. Yaubada yana nuwanuwa omi fa'imiya au hidede amine.

<sup>9</sup> Tu ve'ahawahawahega tobohiyamiyao tovetumagana ami yo'o agaimiya fa'ina ime keke ana'etoladini, fa'ina omi taumiyao ve'ahawahawahega ana nuwanuwa fa'ina Yaubada againe ahe wasikulu.

<sup>10</sup> Ada wona velemona tobohiyamiyao tovetumagana adi yo'o Masedoniya anafafali matatabuna agaidiya ve'ahawahawahega amine wahuluhuluva. Tobohiyameyao, kadu anagahevagadonemi be ve'ahawahawahega againe wanatutuveguvegulami.

<sup>11</sup> Giluboda-mo'emi be kukuya againe wanamiyami, ami mata'atubodagaga wana'itave'avina, keke wanamiya-kawowo au taumiyao nimamiya wanafaisewa-hagihagi boi akivetuvetunumi amine.

<sup>12</sup> Medede amine wanahuluva be higa keke tamo hakwadi againe amiga ami kevakeva fa'ina wanavetumagana, au taumiyao yami faisewa againe wanavaivaina, ada au hidede amine yami dewa ginalubodana badi Yesu Keliso keke hidavetumaganeni-ma matadiya.

*Yesu yana yewa'ela ana toveya to'alika tomiyami fa'idiya.*

**13** Tu tobohiyameyao, keke nuwanuwama badi alika againe hi'enonuwaulu-ma fa'idiya wanunuwanuwafani be higa badi Yaubada keke hidahalameneni-ma hitagitagi-fa'ilila amine omi keke wanatagitagi-fa'ilila. Badi yadi abaluve'avina keke, fa'ina keke hidanuwanuwa vaita tobohiyadiyao hi'alika-yo hina Yesu buye himimiyami.

**14** Ide kavetumagana higa vaita Yesu gi'alika be gimiididi-havagi. Medema fa'ina kadu kavetumagana higa vaita Yesu ginayewa'ela ana toveya, Yaubada badi Yesu ana tovetumagana hi'alika-ma ginasivemidididi be Yesu buye ginanauwedi yana abageya.

**15** Kaiwabu Tauna yana gahe amine hidedemi avenuwa'atami, higa Kaiwabu Yesu ginayewa'ela ana toveya ide gaveyao Yaubada keke gidavega'auleda tu aimo wayawaida kanamiyami, medema keke wai kananagoni. Au badi alika againe hi'enonuwaulu-ma wai hinanagona tu ide wai kanamulina.

**16-17** Au Kaiwabu Tauna lobama amine ginahobu'ela wakova'awafatafatana kadu lobama ana tovenuwa'ata kikaiwabuna wa'agona kadu Yaubada yana hiulega wa'agona. Ada nagona badi Keliso ana tovetumagana hi'alika-ma hinamididi-havagi au ide gaveyao Yaubada keke gidavega'auleda tu aimo wayawaida kanamiyami, medema auhe'ama ide buye se'eyaine ginakifatumida digo buhibuhi againe ginanauweda be lobama hinafane Kaiwabu buye kanave'anauhaga fa'ina. Ada au Kaiwabu buye kanamiyami-vagata.

**18** Hidema fa'ina mena Kaiwabu yana gahe againe buye wanave'ahawahawavemoluva be yami tagiya to'alika fa'idiya ginahavaina.

## 5

*Yesu yana yewa'ela fa'ina wanalulauboda.*

**1** Siule tobohiyameyao, keke vaita gava tova o ka'i gava aituha Kaiwabu Yesu ginayewa'ela-ma fa'ine ana'etoladini, keke.

**2** Fa'ina omi taumiyo wahalamane-hagihagiyyena tokai'afu bogi againe tonimanuwa ginavefuta'ana amine, Kaiwabu yana yewa'ela tova kaliva ginavefuta'adi.

**3** Kaliva hinagahegahe hinagayo, “Fafali moya'aina agaidiya niwalova gisena. Keke tamo vita kananuhagani.” Hidedemi hinagahegahe tu auhe'ama agolaufofolo lakahina badi agaidiya ginalakayemu. Kwamayoku wahifugadi auhe'ama hinavefahedi be yadi aulolo ginayemu amine, meda badi tomiyababi agaidiya aulolo lakahi-mo'ena ginalakayemu ada keke adifaiweya hina'ota.

**4** Tu omi tobohiyameyao Yesu yana yo'ogaga agaidiya keke uyuyu againe wadamiyami fa'ina, Kaiwabu yana tova keke ginavefuta'ami tokai'afu tonimanuwa uyuyuya givefuta'ana amine.

**5** Au omi moya'aimi mahalina ana kaliva, yami dewa kabu'avane uyadeyadeya waseseyemaunena. E, ide keke uyuyu ana kaliva higa vaita bogi againe yada dewa sevasevauyana kadalafilaisewani.

**6** Ide mahalina ana kaliva fa'ina, keke kanadauda badi Yaubada keke hidahalamenanima hidadauda amine. Au kanalulauboda ada taudeyao kanahawatada.

**7** Au uyuyu againe kaliva hidadauda. Uyuyu againe kaliva gufa laulaugina hiyuyu-fa'ila be hivevekwavakwava.

**8** Tu ide mahalina ana kaliva fa'ina, taudeyao kanahawatada. Vetumagana kadu nuwakabubu vaita manawada ana abaseboda amine kana'osena. Ada kibababala ana lulauboda vaita gaviya ana kedukedu amine kana'osena.

**9** Keke vaita Yaubada yana ila'a guwana kananuhagani fa'ina gidavenuwadadaneda, keke. Au givenuwadadaneda be yada Kaiwabu Yesu Keliso yana veluga againe kibababala kananuhagana.

**10** Bana'e ide fa'ideya gi'alika higa ka'i wayawaida kamimiyami o alikeya ka'enonuwaulu, au Bana buye kanamiyami fa'ina.

**11** Medema fa'ina Kaiwabu ana vetumagana againe buye wanave'alulau'age kadu buye wanave'avelueluga. Ada au wona velemona hidede amine mene wahuluhuluva.

### *Kivetuvetunu tulina tulina.*

**12** Tu tobohiyameyao ave'o'olemi toyogina be badi Kaiwabu givegidedi be omi tovetumagana ami yo'o hinafamiya hifififaisewa-ma wanawowomumuyedi. Badi hi'ita'itave'avimi kadu hikivetuvetunumi.

**13** Yadi faisewa haghagina fa'ina yami wa'asehawahega wanave'amohimohinedi lakahina. Ada omi taumiyaو veyao againe wanamiyami.

**14** Kadu tobohiyameyao, agahevagadonemi be badi himiyamiya-kawowo wana'ago'abiyedi, badi matamatauhidiyo و ase'asedi wanakivevatuna, badi kowakowadiyo wanavelugadi, tobohiyamiyaو moya'aidi wana'atuvefa'iledi.

**15** Hai kaliva nuwanuwana koyona kadu koyona againe ginalaufata, medema wanahawatana. Au giluboda-mo'emi be buye wanave'anuwanuwakabubu, kadu meda mali kaliva moya'aidi wananaуwanuwakabubuyedi.

**16** Tova moya'aina wanavemwavemwamwala.

**17** Tova be tova Yaubada againe wanave'ove'o'ola.

**18** Gavadi gavadi moya'aina agaimiya ginalakayemu, medema fa'ina Yaubada againe wanavesivesiule. Omi Yesu Keliso yana kaliva yana vevine fa'ina, Yaubada nuwanuwana omi medede amine wanahuluva.

**19** Alu'aluwa Mahalina yana faisewa keke wanahawatani.

**20** Bana Yaubada yana venuwa'ata tovetumagana gitunevehabalutugidi-ma keke wanahawave'iyohoyohoyeni.

**21** Gahe moya'aina inubana ka'i Yaubada againe o ka'i keke ma wananaуwave'uve'un. Hadema gahe velemo'ena, medema wanavenogalena.

**22** Koyona tulina tulina matatabuna wanavek-

waulaugena.

*To'etoladi yadi lukafoi.*

**23** Kafoi tobohiyameyao, Bana Yaubada aseniwalova giveleveleda-ma gina'ihagihagiyemi be yana kaliva yana vevine mahamahalimo'emyao wanamiyami. E, ave'o'ola be nuwahinagemi matatabuna kadu wowomi matatabuna gina'itave'avina ginanunauwena tu yada Kaiwabu Yesu Keliso yana yewa'ela ana toveya wanamiyami ami vita keke.

**24** Bana gikovami be yana yo'ogaga agaidiya waluku-ma au hidede amine agaimiya ginagugai, ada Bana giwonadabadaba amine ginagugaiyena fa'ina adafaiweya kanavetumaganena.

**25** Tobohiyameyao, ime fa'imeya wanave'o'ola.

**26** Kafoi tobohiyameyao moy'a'imi. Ime fa'imeya tobohiyamiyao wana'atulauhidhi higa yama nuwanuwa hawahawahiegana agaimiya wadaseyemaunena.

**27** Kaiwabu ana eganeya gavehimeyemi be tamo hakwadi tovetumagana ami yo'o agaimiya hida leta a'etoladina-ma tobohiyameyao moy'a'imi matamiya ginahawana.

**28** Yada Kaiwabu Yesu Keliso yana nuwadogeya wanamiyami.

(Ime Folo Sailosi Timoti bonama.)

**YAUBADA BONANA VEYAO IVAGUNA Bona  
Iduna**  
**The New Testament in the Iduna Language of Papua  
New Guinea**  
**Nupela Testamen long tokples Iduna long Niugini**

copyright © 1983, 2003 Wycliffe Bible Translators, Inc.

Language: Iduna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

---

PDF generated using Haiola and XeLaTeX on 18 Apr 2025 from source files dated 31 Aug 2023

73458371-ad55-5c77-8b6b-5eca8d58f667